

卷之九
亭

人民部

藝文志

傳下

文安縣志

八册

文安縣志卷之九

亭

人民部

藝文志

高念侶傳

胡士著

高公諱光夔字念侶號得一世居燕山文邑父侶鶴公才優學博登前明
丁卯科賢書爲江南建平桐城邑令廉能惠澤迄今有召杜稱兩邑多侯
隱德預卜其克昌厥後逮侶鶴公卒於桐邑人無少長貴賤咸載絮酒哭
臨如失怙恃見公之盡哀盡禮雖苦塊中具饒器識益信前言不妄公時
方弱冠扶櫬北還苴茹徒跣以營大事讀禮之餘復精研經史詳究制義
寒暑靡倦丙夜不休年十九領戊子鄉薦明年己丑捷南宮以庶常讀書
中秘尋陞弘文院編修世祖章皇帝時幸史館賜詞臣品饌酒醴顧問優
容凡所召對皆洞達國體深明經術之語一時朝野依公爲重方擬晉輔

端揆啓沃君心霖雨蒼生閱三年循內外互用例擢公廣東督糧道布政使司左忝議再陞江南揚州海防兵備道副使一時愛公者有長才短馭之歎公不以內外歧視朝受命而夕飲冰惟隕越是懼卽一方一面必以天下之治治之其赴嶺表也捧王言攜琴鶴寬則恬如春風嚴則凜若秋霜念積貯爲天下之大命漕務積困已極興大利除夙弊一時漕政肅清會奉詔咨詢兵民疾苦公條陳四事剴切詳明皆蒙聖天子採納其抵維揚也念揚爲東南都會民勞兵弛夙稱難治公至撫綏訓練閭閻行伍交慶更生公餘惟加意造就人材賞拔才俊多成名進士無何海氛犯江上公規畫方略裹甲登陴厥功不細矣寇退連染將興大獄公極力解免全活十餘萬人嗣以船工詿誤解綬之日襖被蕭然揚民焚香遮道攀轅灑泣自江都以下二百餘里奔呼者不絕立去思碑以志甘棠遺愛焉尋開復補粵東雷州司馬粵東故持節地公不以左官遲暮精心吏事時值季

會城凡奏讞不決者督撫悉以委公多所平反獄無冤滯人頌神明其有
造於粵民大矣未幾西南變逆粵地震搖威力迫脇利祿誘從僞檄之來
飛馳如雨公堅持大節誓以死狗激厲一時共奮忠義逆氛膽落氣折疆
土恢復公以北堂年高力請終養各憲慰留弗許會衡文之使乏人兩臺
雅重公文行繕疏合請急以學使畀公嶺南人士鼓舞聞命公視學政甫
兩日卽邁生母郭太孺人之變公哀毀骨立倉皇歸里自此十年間南北
風塵艱難家食而公褐衣粗糲論文賦詩晏如也平居謹言慎行謙光持
己和易接人絕不知爲簪纓世胄併忘其曾染翰詞垣君持節東粵秉鉞
維揚也旣賦遂初復不以私事干謁至事關地方利害里甲難白之事不
憚苦口直陳多所興革方多難之日兩辭僞職獨秉丹誠志氣泣風雷節
操堅金石方之鞠躬盡瘁又何多讓人曰忠矣公益歎臣職未稱也若乃
篤孝慈幃色養備至游宦萬里陳情乞歸以至捧檄志喜風木悲號卽古

承顏順志何以加茲人曰孝矣公方懼子道多缺也通籍既久不事紛華歸田之餘家徒壁立衡門泌水高致足風人曰清矣公回思疇昔虛糜廩祿濫綰縷組覺今是而昨非也當公之歿也邑侯張公朝琮卽日弔臨分俸爲賻索其遺行申詳各憲崇祀宮牆非公德之服人其何能致是耶生爲名宦歿爲名賢鄉之父老子弟望其槩梅儿筵咸生矜式之心以視夫世之仕宦生則鼎鐘歿則蓬蒿不再傳而姓氏無聞者其於人輕重爲何如哉余入史館後於公者十餘年稔知公之勲名節義故備述其事而爲之傳以志景行非阿所好也

白衣山人傳

傅山

白衣山人井先生者北方學者之所謂井虞章先生者也先生名焜字季韞別號虞章世爲文安人築山房讀書其中劉先生胤平署之以白衣乃又號白衣山人也賦異資好讀書多識古文奇字爲諸生不屑屑帖括博

極載籍原原委委經通十三注疏補注文選諸賦發昔人未逮餘力迺
及制義而甲子以易經舉於鄉實出襄陽汪公月掌門汪公亦烹廟時瑤
人所指爲門戶人蓋端人也於是先生問學之功益得所趨向連不得志
禮部謁選知蕪湖有九江警先生協守將先計折衝之湖人以爲才會有
司城之擢壬午計以直忤時左遷丁內艱因卜居南京服闋補浙藩照磨
又卜居西湖擢知竹溪以病辭復歸白下益肆力著述已亥北歸再理蕪
園綴輯殘籍摩研編削不知老之將至七十有四歲而終曾祖瑁贈中憲
大夫祖濟博任雲南按察司副使父拱垣贈文林郎母紀氏封太孺人子
姓奕奕有家乘遺詩文十卷示兒詒六卷左傳九抄四卷古文奇字一卷
袖中簡一卷縣志二十卷縣爲九河下流苦水患故志獨詳於河渠幽貞
賦一卷幽貞達旨一卷賦疾惡佗僚情見乎辭藏於家 野巖遺民曰世
衰道微師友之道弗講卽問學何有焉余聞井先生實師桐城左蒼嶼先

生而友則閣部文忠公孫高陽諸公子鹿乾若喬梓李清仲沈無謀孫徵君鍾元諸先生先生之所習聞見討論者亦何等事哉先生往矣錫山許生子韶精繪事曾爲先生作紳園圖厯厯寫所謂曰方塘曰松林曰止亭曰野客巖曰寒香院曰菜畦曰藥圃曰白衣山房曰鑿坏隱曰靜寄軒隱用小李法金碧丹青矣而復出新意稍稍以雲煙縹緲之以細字厯識先生諸小記纔三五句耳不彫不野按圖讀之樸奧簡雋髣髴先生在焉

高遜山傳

紀 昞

高松字守之別號遜山文安人少負雋才工書及畫試策不第於明嘉靖間以貲入官又不屑意益習爲殿閣體下筆輒用姜堯章法所傳筆法源流一六足覘其概也公既潛心帖書乃取崔瑗受師蔡邕永字八法推廣而變通之側化十七法勒化十法努化六法趯化十三法策化七法掠化十法啄化四法磔化八法共得七十二法亦一時之精思也又有字忌八

病如牛頭點鼠尾撇光脚鶴膝勾劣折木柴擔之橫畫竹節稜角之轉豎
各爲寫形書贊妙有規畫備詳古人之論書上自漢章帝下至李陽冰參
以己意陰陽結構之間無不殫悉復取古今善書者蒼頡以下百數十家
錄其姓名附於卷末摹勒成帖卽此一事亦足流傳不朽矣爾時旣馳聲
海內鄉曲里黨之中奚不貽留數榻而茲帖乃存土司李於太原市肆覓
得之余從觀記之以詩因慨然世之湮沒靡聞者正復不少也猶憶井蘭
溪於崇禎丙子丁丑間過都縉紳名流如周巢軒諸君迎問貴邑有高遜
山先生者名登畫譜其遺跡尙幾何并謝不知周笑曰遜山名徹海內而
迺不足比閭耶蘭溪歸始訪其後裔令所親轉購之後人單弱農野不知
丹青爲何物但云家有累紙積度閣間歷年已久未審是否亟檢取遂以
數斛米易之發函啓視片幀尺幅尙可十數種并持至長安裝潢之分餉
諸人大相稱賞又擇精美者珍爲家藏未幾甲申之變隨與豐城之劍而

偕逝矣豈僧繇之龍點睛飛去天生神物不令久留世上耶迄今所可見者惟余從叔吳堡公家僅存一竹長可數尺森然玉立不減宋之彭城每一展玩輒爲歎惜以公之才書品畫格擅名一時四方之好事者譜之於冊名流之間聲者問不置口俯仰吾邑三四百年以來才藝兼長未有如遜山其人者所傳論序畫竹之法及竹態墨竹等說具詳畫譜前誌松謚嵩今據筆法源流及畫軸圖章特爲改正云

紀都諫傳

張英

都諫紀公諱愈字孟起先世自山左徙居文安爲邑中望族父六息公積學種德以子爵屢贈中憲大夫母馬氏贈太恭人兄弟三人仲爲徵士炅季爲太守元而公居長生而至性淳篤天姿朗豁勝國戊寅啣蓼莪之痛哀毀骨立奉太恭人之訓鍵戶讀書不涉外務瓦屋三間機雲分座內而揣摩文藝外而課理田園田畝之所出一絲一粟悉以白母籍之毫無浪

費崇禎壬午益津觀察河津趙公課試闔屬士子以七藝糊名分投棘闈
例公居第二人爭目色之一時雁行之盛靜海則推高文端大城則美劉
端敏霸州則稱郝冢宰同里則有陳侍郎公以文章聲氣頡頏其間顧偃
蹇猶未遇也而名噪畿南乃每試輒躋益復拓落遑遑使酒投博習爲名
俠能急人之困遠近交稱之庚寅丁太恭人艱含酸茹痛讀禮之餘倍肆
力文軸甲午科試冠軍隨膺選貢大爲學使程公芳朝司成馮公溥所賞
識長安貴交有勸之謁選者公笑而謝之迨至午未聯蜚起家內閣中書
舍人遷兵部職方司主事考選戶科給事中晉工科掌印給事中公廻翔
禁密有年明敏篤誠溫恭練達至今綸扉諫垣之間稱老成持重可爲同
官模楷者則必曰紀公云爲中翰時從定南郝將軍征江西其時居民爲
賊所迫脇者衆幾有火烈崑崗之懼公以至誠感悟將帥爲敷陳朝廷好
生之德且言若從重典恐堅人從賊之心故皆得招徠安集全活者甚夥

至還俘繫之難婦尤稱長厚其爲諫官卽首言逃人株連之害禁其妄指主家詐陷良善禁網得寬永著爲令公之於事必舉其利澤久遠福及百姓者以言之若指瑕抵隙撫拾瑣細以塞言責公深恥不爲也典試中州號稱得人視榷龍江能祛積弊厯官於朝而行若韋布嘗掖垣休沐閉戶課子過其第者不知其爲津要戊辰七月體微不平廿三日早起猶呼從人入直家人勸止之日色向午呼取棋枰與韓子叔錦對局子未數行而溘然瞑目赴玉京矣深山尊宿多年薰修而不可得者而公乃從容脫棄如許其仲弟旻哭公詩有云手拈棋子端然逝定得人天正路歸蓋實錄也沒後數歲里人思之不已撫拾遺行白之當事申詳各憲允祀官牆而都諫亦可以不朽矣予與公同成丁未進士及對大廷同見知於高陽相國交契最久相知最深公令器遴宜以甲戌進士筮仕蕭縣令特來謁見偶觸目思公而爲之立傳

紀太守傳

王士禎

紀公諱元字季愷號子湘其先世爲山左人始祖諱壽者明永樂間始占籍文安累傳簪纓不絕七世而爲封君公克揚封君丈夫子三人公其季也公生有異稟一目十行俱下爲文操筆立就戊子登賢書乙未成進士而予獲與公同譜初任杭州司李予時亦任揚州司李問遺往來不絕也丁未量移江南徐州河防同知辛亥陞湖廣漢陽府知府庚申再起爲陝西鞏昌府所任皆繁劇地而公處之裕如功業在國家利澤在民物卓卓有可紀杭爲東南都會訟獄繁多簿書填委公才長心敏一見了然多所平反向時囚罪無大小輕重共繫一獄牢戶湫隘疫氣薰染多致斃命公惻然憫之申詳各憲於錢塘空地別建官倉數十楹以居輕犯全活不可勝數杭嚴道范印心爲諫垣汪諱之洙者叅糾落職逮問公知其冤力爲刮雪時汪適典試兩浙各憲重違其意復行駁審公俟棘闈事竣卽攜案

卷詣汪汪蓄怒以待公笑曰此朝廷三尺法豈容私意於其間耶手摘疑件逐條指示曰必如公意請公出一讞語職當平署之可乎汪愕然汗下遜謝曰不意風聞誤聽一至於此君執法不撓真包孝肅一流人也遂引入座上締交盡歡而范事得白是時浙中有通海逆書諸大獄刁風煽螫公力爲砥柱嚴禁波累民賴以安其防河淮徐也茶菴堤決城不浸者三版闔郡惶惶爭避水登雲龍山時值大風雨紛傳堤岸盡潰夫役迸散吏胥懼固請公公屹不爲動曰吾任河工避將焉往此身與堤當委命陽侯耳馳騎河干從者僅三四人張蓋堤上人民望見稍稍進遂辦布袋數萬條囊土以塞之堤完城無恙守漢陽時兼攝武昌駐防官兵數千因糧芻不給將圖不軌公中夜聞之請於撫軍持三月糧至營開諭之三軍戢然是時王師數十萬下楚軍需給繹公咄嗟立辦制府蔡公毓榮器之檄往荊州供應公以大軍雲集不能分身往轉檄漢陽令齎解草豆等項不意

中途遲誤竟以此落職然雖註誤之後督撫猶皆委重公公亦任事不避
蒲圻縣紅石等團跳梁負固大將軍欲遣官招撫皆畏難不敢行公曰叛
在賊不在民朝廷赤子豈敢久抗王命耶遂慨然啣命而往單騎入營開
誠勸諭果相率歸命叙功僅加軍功紀祿二次而已鞏昌邊徼荒涼民無
完堵公招徠有法始漸次復業修整學宮講明祀典博求遺籍其士人彬
彬多文學之風焉公平生慷慨好施予能周人之急人有急難相投無難
易輒應之黜者或以是相嘗公亦應之不疑至其人後或相背負夷然不
以介意也遇事敢言無所迴互批隙導窾動中機宜以故所至上臺皆加
器重然亦以才爲人所忌又性疎直不能閤媚以趨時故蹶而起起而復
蹶而位卒以不大顯公家居有德於其鄉人自陝歸時與予晤於京師時
同譜弟昆猶滯宦途者惟予與宗伯王公吳廬在耳俯仰四十餘年不禁
零落之慨公旣歿吳廬志而銘之而予爲之立傳

青溪先生傳

黃叔琳

先生姓井氏諱在字方陽號存士又自號青溪先生豐利仙居鄉人也成己亥進士授平陽司李改補粵之永安令再補晉之興縣以抗直不事上官年七十二以卒歲在己巳予試潞河得吾友陳子儀奇其文而問所從學則以青溪先生對道先生事縷縷予聞而心識之是後儀來長安輒館予家每張燈設酒縱談舊事必及先生蓋文行宦跡予耳之熟矣先生厲氣節孰奇嗜古其爲政方嚴治大體用法廉平而尤長兵略其司李平陽也精敏獨任風裁不徇成讞以阿上憲意吏畏之莫敢仰視而決讞多所平反所全活數百人嘗有大獄所蔓引者不可勝數先生片語立決卽遣解之其疑案不可究詰者務寬期以致真兇不急於文簿而煅煉入人罪嘗曰事固有急之則兇奸之彌縫益密緩之則無意之洩漏可期誠聽斷者之明鑑也當是時府無冤民去官後民思之爲刊其政於石先生之去

平陽也以父竹溪公之沒竹溪公諱焜前甲子舉人授蕪湖令再授竹溪令幕陶靖節之爲人罷官家於江南不北歸先生成進士乃肯來就養官平陽奉養著中晨昏一如內則儀沒而徒跣奉柩以歸歸而喪葬咸於禮皆力所獨任不以及兩弟也值節推裁缺起復改補永安令縣隸惠州惠與潮犬牙相接而永安之南嶺大山四周交連四邑之界最稱險利撫曰李唐宗者大猾也盤踞其中蓄髮陰謀不軌矢石械噐俱備聚不逞之徒千餘人又使其子如冕等統礦徒四五百人於赤溪開採招集亡命橫於一方前令莫敢問先生至則修浚隍陣團練鄉勇爲未事之防而唐宗爲之歛迹已而三逆煽亂潮鎮劉盡忠密授僞符將變全粵陰約唐宗爲犄角先生遣役林奇等以鐵匠入具得其狀密申撫鎮陳搗穴之策選鄉勇之精壯者三百餘人爲親丁結以恩信日椎牛饗士先是副賊李海政焚掠村寨先生設伏擒之人賴以定永民勒碑記其績已而撫檄下督府鄧

進兵協勦先生部分鄉勇扼據要塞而自以親丁會督府兵抵山下賊兵在海上者不得合而逆鎮劉盡忠亦以先期未發救援路絕唐宗遂薙髮出山詐降冀以緩師而待援也先生決計勦蕩遂同督府鄧麾兵梯山而上抵其巢分兵搜捕得僞隆武印勅各一及與潮鎮往來書遂斬唐宗於軍前而殲其黨與獲旗甲器械無算雪其民之脇於賊者百餘家南嶺平平未洽旬而逆鎮警報至矣向非先生發之迅而防之密二叛並勢以搖潮惠則全粵隨之撫軍劉公諱秉權奇先生之功疏奏之格於部議茂績未叙而太夫人之訃至矣當是時逆鎮僞檄日至唐宗餘孽訛言四布永人一日數驚吏奔號就先生於喪次凡事不關白攝令皆受先生部署先生強起巡城訓厲軍士嚴城門之啓閉授守禦之方畧意思安閑士氣自倍凡十餘日而定先生北歸吏民送者千餘人凡三四百里然後號泣辭去先生歸喪葬禮率初服闋再補興縣治迹如司李平陽時而抗節益厲